

年補灤州去後累遷廣西布政使
李逢源字問渠錦縣進士同治十三年自清苑縣遷來逢
源故見賞於曾文正公到官未幾以憂去服滿遂不再出
朱靖旬字敏齋安陽進士光緒元年任長於治盜境內帖
然在州九年士民愛敬故事保定府缺總督於諸府中擇
賢能調補朝廷選人補所調之府謂之遺缺知府保定府
爲首府無自知州升保定知府者合肥李相國督畿輔久
獨悉靖旬賢自涿州升補保定知府蓋異數也他州無有惟
乾隆時知州尹侃自涿州升保定靖旬與侃後先相望亦
自涿州升保定州人侈談以爲榮然侃先遷南昌知府雖

未到任尙爲會補知府者不若靖旬徑由州超遷也靖旬後
官直隸按察使署布政使

王炳壇絳州進士光緒九年任以儉約愛民爲治任滿引
去庶幾知止足者

乾隆後教佐事績多不著惟尹侃塞滹沱決口嘗委州判
楊瑗率武強典史許遵王督近村築隄七十丈道光舊志
載學正張廷楹河間舉人嘉慶二年任勤於其職士風一
變在任十九年以憂去官後數過涿州諸生輒拳拳不忍
別也咸豐時州判顏錫敏城陷死節事迹見兵事門中咸
同間學正張德潤天津舉人操行端潔諸生敬憚咸豐五

年任同光間州判張映樞最知名映樞平定拔貢同治五年任歷任知州自劉秉琳游智開吳汝綸朱靖旬皆與友善屢以卓異薦汝綸爲冀州調爲冀州判汝綸去官始還涿州有讒之於布政使者布政大計時劾以年老合肥相公識其名曰此君歷任知州者皆稱其賢乙其名不劾初道光初張杰檢括境內廢廟田盡爲義學學二百四十五所籍記學所在村其學田若干畝在村何方何人佃田田收租若干石具箬於籍不令吏胥與聞久之學寢廢田所入租諸豪私據有之於是州每歲遣役巡視豪與役錢役還告州曰學具存無頽壞者州信之每歲遣役習以成故

矣及劉秉琳時父老言遣役之弊於官秉琳於是止不遣秉琳去游智開代智開曰遣役弊在役不遣役弊在村均之弊也於是檢察益嚴學一所延師何所人姓名何也諸生若干人何人之子何名讀何書年幾何皆記之冊及去官以冊授後任吳汝綸曰此前政張伯良善蹟也慎毋廢汝綸以冊召師生詢之則盡妄也遂言於總督合肥相國李公曰學多如此幾於村村有學然州民往往連數村無一識字者此學廢驗也前政屢變法不能復振起非大革變之不可請檢學審廢者籍其田入書院書院一州三縣所公共耳目衆箬不致若村學散漫無可考也但恐後來

者以義學名美又還田於村學請定爲永式勒之碑俾勿壞李公然之於是得廢學田一千四百十九畝有奇歸之書院逾年汝綸以憂去代者還一田於村使復立學於是村村求還田不許是時州有大賈人在京師交通貴顯有勢力州人遂入京因大賈以通言事御史御史言之朝直謂汝綸廢州所有諸學而席卷其田所入糶載以歸事下李公公遣知名官李秉衡與知州朱靖旬檢視還報曰田所入足充師生資用者仍許還之村復立學不足立學者乃入書院是後村村請自捐田益舊田令足立學求還田田大率盡還而遣張映樞覈學田無令再廢壞映樞覈田

其法入村問義學何在大書義學榜於門問村人義學田所在四至與何人鄰買石書其田廣狹長短丈尺幾何其田畝有幾何方與何人鄰大書深刻於石而埋之田四際爲書告汝綸曰義學田自此其永不廢壞矣汝綸復書前廢學時田故在也學亦故在也田所入不歸學學師生皆人家自延請特借義學舍處之公等何以救其弊好爲之吾不復與聞此矣其後歲餘而諸學復廢吏目朱穎歛縣人同治九年任與張映樞善亦安靜能八分書

右溪州

武彊舊志名宦有傳者明惟成珍我 朝惟李模乾隆州

志增明代七人曰吳鳳鳴邵經馬充姚漙梁忠錢博學劉卿我朝四人曰劉朝宗梁世通李道光潘拱辰蓋綦慎矣今考於舊志復增於舊

洪武間知縣夏安禮王思道先後修廟學洪武十年知縣張惟康任惟康福建人後祀名宦

吳鳳鳴華亭進士成化二十年任嘗修廟學先是知縣施惠嘗修學及鳳鳴又增修之調蠡縣武彊人攀送不忍別後卒官喪過武彊人哭之如嬰兒之哭慈母也祀名宦

邵經江陰舉人嘉靖間任嘗丈地均糧賦發奸如神祀名宦

宦

張籍渾源蔭生嘉靖七年任始建崇聖祠先是吳鳳鳴後弘治間曹文通正德間宋銳皆嘗修廟及籍又重葺之曹文通睢州舉人弘治六年任文通創建兩廡宋銳新城進士正德十六年任初武彊科第無題名宋銳始榜題名於明倫堂壁

馬充陳留舉人嘉靖十四年任誅兇民孫德郭貴實大俠劉貫於法民德之

姚漙字維順慈谿進士嘉靖二十年由工部郎出宰武彊時上官科役繁漙一切不應修廟學創立名宦鄉賢祠又新縣宅又新後堂名之曰澄思堂其政事之堂名之曰親

民堂親民堂慈谿編修袁煒爲記澄思堂名宦鄉賢祠皆
武彊編修歐陽暎爲之記暎與漣同年友親民堂澄思堂
記不載載名宦鄉賢祠記曰名宦鄉賢祀於贊序國之大
典存焉武彊學久廢是禮英服哲宗豈乏構始之謨秀葩
菁莪非昧景行之志良以尙論貴當推戴宜孚是非之衡
久而後定趨崇之義勢去乃平是以其難其慎用待將來
嘉靖辛丑邑大夫慈谿姚君漣釋褐南省輟序冬曹綰綬
臨民飛鳧試政剔繁飭廢則月生秋甸播惠平施則花滿
春城於是旣奠樸氓思綜縟典蒐逸檢曠豐賁咸修樹極
展規秩序罔墜乃遂戾泮水采香芹橫墳索召青衿商懷

古之道講振俗之務謂自有縣以來迄於今日循良之績
豈弟之賢聲蹟遼邈世代疏闊雖甘棠不朽蘭茝傳芳而
俎豆未修曷從仰止於是稽信史采逸牒考遺猷扣往韻
質龍鍾之老詢博雅之士廣其議柄揆以大中其專城應
宿奮庸展采功德著於斯土士民歌頌不忘者得節度使
李春縣尉孫善知縣張惟康吳鳳鳴邵經凡五人曰是可
祀爲名宦載及山川之毓桑梓之英行徵道誼風存大雅
業望赫於當時聲藻振於來世者得光祿大夫孫惠蔚大
理卿蘇瓊左僕射劉幽求翰林院修撰牛繼志知府李溟
參議李衍凡六人曰是可祀爲鄉賢夫諸公之政與行不

同也而保庇蒼黎增輝閭里志則同方道無異致自今觀
之或力障危邦矢勛屯會或撫存新造貽頌去思或肇建
城郭害驅蛇龍或均平田賦弊清狐鼠或博洽墳典考定
遺經或執守寬平匡回暴主或決策虎變銘勛旂常或捷
魁龍化列職清峻或剖符百城風存長厚或敷歷旬宣業
守忠清或著績前朝或策名聖代或簪紱粹彥或武弁勲
閔或學克濟世或位不盡德其流波遺響餘緒往轍咸可
以標準來賢振厲頹俗譬之周行矩戶衆所登由社木鄉
泉人斯憇潤桂簧松韻揚其清烈景曜靈鸞煥其輝采誠
恒漳之間氣趙冀之文獻所宜秩範膠庠奠食斯土者也

外此非無惠政豈絕芳藻顧禮崇嚴簡義取精英仍虛其
餘以俟論定遂乃質成當道深獲嘉允稽謀僚庶罔不僉
諧爰於明倫堂之右方肇啓二祠祠各三楹費出稍羨役
取胥徒材因土宜規從地便士釋經而董作工獻圖而就
緒弦望未周堂構落成雖事屬朔始厥制未弘有其舉之
增美有地矣特涓令辰具禮奉妥弁定祭品儀章之制義
兼質文禮酌今古載在縣典燦有成規姚君以書報予曰
子不可無記予曰諾夫崇古所以勵今師往所以開來貴
德所以淑世慕績所以起業樹聲所以宣化秩典所以立
範操本所以圖大貯神所以握機粹精之懷曠然遠鑒和

中之韻悠然感通治之精也教之源也乃若繁書峻令密
網深文揆攻立奧綴砌麗藻日以治以教也亦淺矣繼自
今春秋供事歲月瞻依得無有相感而興者乎譬之蓀蕙
杜蘅挹者必染其清香大圭古鼎觀者自厭夫華俗潛滋
惠衷默撤塵想努升循列勉赴賢評敬之哉敬之哉是禮
也肇采開先經成圖永則姚大夫惠宰教彰化虛已稽謀
則督學侍御謝君九儀式賢尚古贊成嘉會則教諭馬君
寫至於執經據禮考德問政協輿情扶公論則歐陽生曉
也禮成遂紀其事并爲詩四章使諸生歌以奉祀其詩曰
采芹采芹泮水之濱豈弟君子惠我下民民之隱矣君子

親矣民之馴矣君子仁矣采芹采芹泮水之陽豈弟君子
德音莫忘維桑與梓君子之光逝矣逝矣百世其芳我思
古人悠悠我心何以薦之采芝於岑鼓瑟鼓琴邈其調矣
以續千載之音漳水東注亦孔之潔言念君子素心如結
亦既降止我心則悅亦既右止對其芳烈後劉沛然亦嘗
修學沛然商水舉人嘉靖二十三年任

胡慥南陽進士嘉靖二十六年任嘗修城隍廟歐陽暎爲
碑記畧曰武彊城隍廟在邑之乾方建置年久厥制未弘
嘉靖丁未南陽胡子尹是邑下車謁神見其卑歛湫隘慨
然有維新之志以邑貧小又初政民故未信姑已之逾年

政立人孚乃令於民之向義者於是泉貨四集乃圖經始
慮妨農廢業違時病民也檄耕穫寒暑時勿集大眾慮材
或苦竄工未集也檄飭化播殖必以良慮民或競趨紛煽
惑也檄庶人在官者役焉無踰常數又慮錢穀冗沓滋偽
肇訛也檄民間自爲出納官不與知於是富者輸貲壯者
效力智者施巧敏者司計匪棘匪弛崇基危構歸聳森嚴
再踰歲功始落成胡子謂歐陽子曰子其書諸石歐陽子
曰於乎遠哉胡子之志乎其政優矣其民和矣夫弊積而
弗振有令而弗從者民罔和也惟和然後萬事可興故和
不可以易致用威則乖用柔則靡用察則惑用疑則歉用

浮飾則侈用摧斂則戕用遲緩則廢用苟且則誤用勞擾
紛更則敝用智力駕馭則詐用僻誕則愚之數者民所不
與也弗和也以事神神且不食其餘胡子皆反是故曰政
優而民和也神樂之矣乃登其事於石并爲頌五章使歌
以祀神頌曰邃始兮無垠鑰混兮機沈曠浩兮忘鄰狃狃
兮綦綦枝遶兮未分膠糾兮繽紛皇度兮軫民險植兮奕
陳立化兮孔赫柄幽兮宰宓屏暴兮畀吉陰憲兮神秩祆
殄兮嘉集貞庇兮猗黜佐帝兮宣律綏莫兮血食茂宰兮
灌壇闕宮兮孔安翬驚兮虬蟠霓裳兮宿冠文杏兮曲闌
修廡兮奧闈晶森兮滄寒燥碧兮暉丹御飄颻兮仙駕螭

爲驂兮鶴跨觀紫虛兮初下啓瑤函兮奏罷爲蒸民兮稽
稷誅魃瘧兮協蜡驅風霆兮叱咤翊沕穆兮元化貽豐稔
兮肆夏雲崒崒兮風颺颺兮星旗注椒醕兮核
雪黎羞赤膾兮飯明粢靈其駐兮慰我思天錦翩翩兮光
陸離秋有菊兮春有芝薦芳藻兮無休時民無疹兮更無
私千秋萬歲兮靈祠慥有晚渡滹沱詩曰十里孤城背落
暉驂駢西渡又東歸魂招宦海身多病望重仙舟事已非
潭底蟄龍眠不穩沙邊驚鷺解高飛微官何物相羈絆慚
愧年來未拂衣

楊衷字文溪鄆都監生嘉靖三十六年任是時天子修正

殿採木南方道路運輸他材物多所興辦畿內州縣運送繁
億車馬罷困不能供役衷建議疏河轉運於是潑冀二州
及武彊鄰近五縣歲省車四十五輛夫六萬三千名銀六
萬三千四百九十兩衷於學宮前移碑亭鑿泮池又於滹
沱之濱掘得石表二移置學宮左右爲題名碑左題科第
右題歲貢歐陽暎皆爲之記二題名記不載載其泮池記
其辭曰粵自元黃判位蒼黎肇始哲憇同途敦澆異趨靈
睿首興瞻言惻憫式觀元始眇覲玄機廸闡性情詔序倫
則是以賢關肇開教鐸始振掀葍琢璞鎔鄙孕英施直化
枉義取風披涵翕御順功超憲糾五典所敷陳九德所宣

示三謨所登列兩雅所諷詠夏庠商序往訓炳焉星回文
雍武鎬彝典昭如日燦崇尙菁莪修飾翰藻尙德明禮鑄
行選言無非揭方圓之秘要寫健順之清英譬之升景樓
而叩洪鐘則聞者神動趨巖廊而鳴佩玉則見者色莊教
固多術其致一也聖代繼統穆清覃崇聲教赤縣神都靈
臺首建窮鄉下邑覺序星羅論鼓以樂辟雍則四自咸服
采芹以遊泮水則九有同風閭里英俊出環堵而遊宮牆
蓬華時髦被褐衣而窺俎豆砥德厲行則希蹤顏閔稽古
考業則羞比桓文橫經論難則動輕馬鄭披圖援典則遠
信姬尼咀六籍之英華則麗藻珠傾漱百家之潤芳則錦

章玉瑩用能棟梁清廟黼黻袞猷鼎樹勳庸垂施馨譽山
嶽齊其峙峯江海比其清流譬之陟崑崗而琢玉斧鑿所
餘罔非琬琰之珍臨湘漢而浴蘭波漪所及俱有馨香之
味遂使六合染粹七政同明歷年二百玉燭常調傳祚十
聖皇靈益赫猗與永休哉亶乎未艾也於維茲邑介在漳
濱土厚水深民樸物茂爰當異地載啓儒林金石遺文不
傳經始之年古砌凋殘徒見頽欹之迹老儒倚席敞構邀
星蒔蔬鞠草之譏昔聞前史子衿佻儻之誚豈宜清時會
非偶然期將有待鄴都文溪楊侯起家西蜀賓藝上林學
賦子虛久應薦雄之召仕紆郎綬不慚司馬之題分赤符

於天省飛蒼烏於神州方輶車之初停屬朝堂之鼎建採
辦孔棘運曳旁午僕夫况瘁大夫賢勞侯乃茂建訂謨首
開便議爰疏舊渠用濟新役徂徠之材溢達漳御有覺之
選不負工師二州五縣歲省銀六萬三千有奇民力大舒
邦猷用贊繼乃澄思政本返觀化源遠慕魯侯上嘉文翁
視學行禮謁廟升堂進諸生語之曰泮水淤涸靈源不暢
矩路之中碑亭礙窒思樂之義何居砥矢之道何由吾將
改爲用諮耆彥於是諏吉創始遵制據經民子來以登材
吏稽籍而息奸士釋經而董事工殫巧而獻圖先移碑亭
於坎方即亭址爲沼未一仞有泉湧出清可以鑑甘可以

汲因贅爲泮池駕三橋其上闢廣宮牆重建門屏撤舊爲
新易朽以堅民不告勞官無苦費百年廢典一旦維新眞
樂區盛地矣諸生藏修之暇於此乎遊息焉則風追浴沂
大夫政事之暇於此乎覽觀焉則義並干旄危梁峻起則
拯世濟川之具存焉源泉不竭則觀瀾深造之理裕焉曲
闌周回則防危翼正之義徵焉湛波中泚則澄性蓄粹之
道在焉矩路端嚴則委蛇具瞻之範昭焉澡浴清潔則洗
心滌躬之機寓焉芹藻芬芳則輸忠薦信之風啓焉漣漪
激灑則修詞綴文之象呈焉宮牆高邈則扣關企聖之志
興焉門屏洞達則明正無曲之度形焉金碧輝煌則賁文

受采之盛著焉結構堅密則固本累績之計周焉物質端
良則天時地材之利彰焉造攻精緻則人官物曲之道盡
焉崇樸以華蓋拙以巧則尚質右文之教兼焉易蠱以賁
增卑以崇則撥傲升猷之旨在焉大而匪侈盛而匪奢則
用中瘦則之訓懸焉瞻之起敬玩之起愛則嚴師慕道之
化暢焉嗚乎噫嘻噫矣諸美備矣維師與生請予爲記予
惟人存政舉地靈人傑其理相需炳焉彰矣自風雅道衰
簿書風熾儒吏益鮮淺夫孔繁一染紛華遂乏貞素怠忽
士林疏逃儒闕至有居崇臺榭而博士無瓊堂擁笙簧而
鹿鳴絕響聞侯之風俛焉愧哉遂不辭而爲之記

錢博學萊州舉人隆慶間任修城置學田縣舊無志博學
創爲之

劉梓招遠舉人隆慶六年任嘗修城隍廟右布政侯世卿
爲之記又修廟學

劉儀字允敬杞縣舉人萬曆元年任家世科第到官不逾
載修城郭均里甲貯穀粟來流移清訟獄去冗費禮賢士
恤貧竄勤課業廣蠲復百廢具興初嘉靖中姚漙創爲名
宦鄉賢祠在明倫堂之背隘於民居儀遷二祠於泮池之
東西又新櫺星門教諭毛如錦爲之碑記

劉卿字孔源興安進士初爲臨晉令有能名以憂去官萬

言八
三
歷十二年再起來任自楊衷修泮池宮牆後二十餘年廟
學未大修萬曆辛巳大中丞陰武督學朱璉移檄修學遣
晉州知州舒九淵來規度或以財詘舉羸尼之遂止癸未
邑人太僕卿賈如式與侯世卿謀各出十金致知縣郭效
程以爲衆倡會效程病死晉州判官徐良材來攝縣事遂
興工未幾卿下車始克成之如式爲之碑記卿爲人軒朗
有節槩侃侃然丈夫也爲政明嚴任繁劇以卓異調滑縣
遷吏部郎再遷河南觀察使於是去武彊八年矣武彊民
猶思卿爲立生祠侯世卿賈如式皆爲之碑

閻球巢縣舉人萬曆二十九年任嘗修廟學新東西廡崇

聖祠
成珍朝邑進士萬曆四十某年任身任民利病每單騎行
縣詢民疾苦廉介祿養不給父貽書責之曰養犬守門養
豕食肉爾得一官使我坐食貧何也珍報書曰犬強自猛
豕壯自肥願大人少待父笑而置之會歲饑請發倉粟振
民上官不許珍曰積穀本以救饑饉而不發積之何用我
縣官也職在救民尙何待遂開倉發粟吏以利害白不可
曰我以一官活數萬人命不亦可乎上官以擅發粟劾罷
珍百姓數萬人叩閭乞留不得請去之日號泣送之二百
里外戶戶祝焉後有薦於朝者補某縣其鄰郡饑民數萬

嘯聚爲寇上知珍能發帑金勅便宜行事饑民亦素知珍抵境叩頭呼救珍開諭之皆放兵仗去所發帑具存報命神宗嘉悅即以帑金寵賚之珍持賜金爲二親壽父果大喜後祀名宦

王九鼎潛山人天啓九年任重修泮池

明代武彊志不詳備吏迹多失不載僚佐尤甚嘉靖間訓導梁忠南海人深識邃學講誦不倦卒官後祀名宦萬曆初教諭毛如錦鄧州舉人嘗爲劉儀撰名宦鄉賢祠記嘉靖三十三年歲饑民高雄張佑等作亂肆掠典史王爵天長人集鄉兵擒盜魁斬二百餘人賊黨悉平崇禎十五年

武彊盜起真定府通判顏公臨縣舉保甲法各村自擒賊境內遂定此其吏績之僅存者

右明

國朝劉朝宗滿洲人順治年任嘗修廟學及崇聖祠爲政精察有膽畧時寇盜四起謀陷城朝宗廉得謀內應者數人杖斃之賊不敢發有大盜嘯聚千人直抵城下要朝宗出見朝宗單騎往泣賊驚服去嘗親捕賊被重創從騎死者二人而朝宗勇氣不少懼去官後縣人特祠祀之梁世通蓋州貢士順治十二年任質樸與民休息以遷去民老幼泣送立生祠祀之

李道光寶豐舉人康熙二年任愛士恤民修學宮補城垣
葺養濟院嘗自爲修學記又構斗室於縣宅之後園名園
曰樂豐名斗室曰則學軒亦自爲之記

李模字闕菴陝縣進士李自成在河南開科試士士皆避
匿自成令曰不試者屠其家不得已皆出試日有爲文罵
賊者有爲文痛哭者有故不成章者自成殺罵與哭者而
劓則其不成章模與焉以故鼻耳不完 國朝丁酉以第
一人領鄉薦己亥登進士廷試 章皇帝問之嘉其節康
熙七年任武彊先是明季賦役繁重民苦無告定鼎初猶
沿明故事模到官私征雜派凡爲民累者盡除之一時百

姓猶出湯火公餘集諸生校文講藝日以爲常寒暑不輟
遷部郎去父老泣送不忍舍

潘拱辰無錫監生康熙二十二年任時年始十八吏役初
易之及視事判決如流皆大驚服民有鄭安樂者無子有
贅壻後自生子安樂卒後子長矣安樂妻中毒死不得殺
者主名株連鄰里男婦十餘人訟久不決拱辰率羣訟者
詣城隍廟禱於神曰願神決之宿廟中夜半告衆曰神告
我矣捫磬而鳴者兇手也遂滅燭令各入捫磬已而呼燭
驗皆朱其手蓋拱辰先以朱潛塗磬上而實其中使不鳴
獨一人手不朱拱辰曰殺人者汝也一訊而服蓋安樂子

欲毒贅壻而誤中其母也懼馨之鳴不敢捫故手不朱一時服其神明時單騎勸農有訟者即郊野決之以毀淫祠得罪權貴坐落職後祀名宦

官朝京字子孟安溪舉人耿精忠既就俘妖人蔡寅聚眾數萬行所過不供資糧者輒以徇官氏聚族而居朝京戒眾保險賊亦不至由莆田教諭康熙二十八年遷武彊知縣會巡撫于公成龍喜猛鷲而朝京不事鞭扑于公下牒詰責不為動是時有司以耗羨充私入朝京獨用耗羨代貧民輸賦貧民以是終朝京任無逋負事見方望溪侍郎所撰墓表

洗國幹南海進士康熙三十年任其告武彊諸生文曰蓋聞緇衣適館雅慕名流良馬干旌願觀姝子父事兄事今豈無人王前士前古傳斯語文翁治蜀人盡詩書潘令栽花邑皆桃李自昔觀風問俗首在得人勿謂擷秀攀芳無關治理矧茲高山在望百里士而千里賢顧任空谷遐心氣如蘭而人如玉有司之過也造士之謂何武彊邑號彈丸地稱首善人文嶽峙接恆麓之高華材彥淵渟挹滹沱之秀潤逖稽往昔近逮今茲孫惠蔚之淹通釐正雅樂皇甫興之節槩照曜河陰非人求官蘇安定之偉節扶危奠亂劉文獻之孤忠或敢諫直言動振山嶽或恤民潔己褒

美璽書國史垂馨郡人侈盛本縣叨膺 簡命承乏名區
坐而吹笙風流之令公斯在入而鼓篋居稽之夙學如林
值案牘之勞形復溯洄之隔面深山藏壁破鑿難施衡泌
多賢馳驅罕效風徽藉甚聞聲相思饑渴怒如交臂無失
屆茲明河引露白帝乘秋假一日以談文抗千秋而尙友
分題授簡下榘研精聽鳥履於晨曦願毋後至屏蘭膏於
夜照殆及同歸共惜分寸之陰各厲風雲之氣文思泉湧
高飛北溟之魚筆陣鋒寒一掃中山之兔楮模先輩接續
元燈鐵結網而月爲鉤掇珊瑚於大海郢運斤而般引墨
栽杞梓於干霄庶幾爨下梧桐遇知音而響發頓令臺邊

騏驥經賞識而價高好爲人師詎下官所敢出去其自足
諒高賢所樂聞諸公其噬肯來乎本縣且趫然喜矣其禱
雨文曰陰愆陽伏實天災之流行修德謹刑賴人事之補
救某到官之始齋宿神祠誓秉公平一持清白有善必獎
無害不除上不負朝廷下不負百姓或徇私枉法受賄行
賕紊亂是非顛倒黑白神必誅殛以代明刑下官愚忱神
宜降鑒方冀與寒時若十日雨而五日風黃茂屢登九年
耕而三年蓄乃任事以來石燕停飛商羊輟舞平疇廣隴
徒見風日之散暄火耨水耕未霑雷雨之動潤枯苗槁穗
赤地堪然觸石膚雲崇朝靳澤循行四野良用惻憫爲民